

بِسْمِ اللَّهِ الرَّحْمَنِ الرَّحِيمِ

# KHUTBA JUMMAH

HADHRAT MUHYI-UD-DIN AL-KHALIFATULLAH

*Munir Ahmad Azim*

23 Decembre 2016  
(22 Rabi'ul Awwal 1438 AH)

**Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din Al-Khalifatullah (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor « **Le Concept de la Révélation Divine (3<sup>ème</sup> Partie)** » :**

Par la grâce d'Allah (swt), mo pé contigné mo Khutba Jummah ki mo ti commencé deux semaines de cela lor concept de Révélation Divine.

Le Messie Promis, Hazrat Mirza Ghulam Ahmad (as) fine dire:

*De parmi bane nombreux formes de révélation ki Bondié fine révèle moi, ena ene là-dans kot, kan Bondié (Allah) désire révèle kitchose ki cachiette à So serviteur, Li faire sorti dépi so la langue détros phrases dans ene sommeil léger, parfois doucement et parfois dans ene façon ki dure. Sa bane phrases ki sorti durement de la langue là tombe lor sa la langue là dans ene façon aussi dure ki kan la grêle tomber nek ene coup lor ene boute la terre dure, ou couma bane sabots d'ene cheval de course rapide qui frappe la terre dans so la course. Ene telle révélation arrive avec rapidité et li tellement inspirant ki tout le corps en entier affecté par sa, et la langue de sa dimoune ki recevoir sa révélation là li bouger extra vite avec la descente de sa révélation là et d'ene la voix tellement majestueux couma dire pas so propre la langue sa. Sa ti sommeil léger là disparaîte complètement kan révélation là terminer et pendant sa moment ki révélation pé déssane, sa récipiendaire (de la révélation) là li vine immobile couma ene cadavre.*

*Deuxième type de révélation ki, à cause de so bane nombreux merveilles mo qualifié de révélation parfait, c'est ki kan Allah (twa) envie informe ene serviteur*

*d'ene kitchose ki cachiette après so supplication ou par (Allah) So propre volonté, alors Allah impose lor sa dimoune là ene faiblesse, kot li trouve li-même complètement perdi en li-même et ki li pé enfoncé dans sa faiblesse là couma ene dimoune ki plonge dans bane de l'eau profond et disparaîte là-dans; Ensuite kan li sorti de sa plongée là, li senti ene sorte d'écho dans li-même, et kan sa écho arrêter, li senti de l'intérieur bane mots appropriés, ki raffiné et délicieux. Sa plongée dans sa tel faiblesse là li ene expérience merveilleux ki pas pou capave correctement être décrit dans bane mots. Dans sa condition là ene l'océan entier de connaissance ouvert pour ene dimoune.*

*Troisième forme de révélation li communiqué dans lé cœur d'ene manière doux. Ene phrase passe par lé cœur kot sa lé cœur là pas compran tous bane merveilles de perfection ki ene caractéristique de la révélation ki nous fine fek décrire. Li pas nécessairement précédé d'ene faiblesse ou d'ene sommeil. Sa révélation capave être reçu en étant complètement éveiller. Nous senti comme-ci kikaine fine soufflé sa bane mots là dans lé cœur ou fine jette li dans lé cœur. Nous capave partiellement éveillé ou peut-être complètement éveillé et nous senti soudainement ki bane nouveaux mots fine rentre dans nous la poitrine. Parfois, dès ki sa bane paroles là rentre dans lé cœur, zot manifester zot la force de lumière et nous rende nous compte ki sa bane paroles là zot en fait pé vine depuis kot Allah.*

*Ene l'autre forme de révélation c'est ki kitchose li révélé par Allah (twa) dans ene vrai rêve, ou à travers ene ange qui prend forme humain et révèle ene kitchose cachée, ou à travers ene l'écriture qui apparaît lor ene boute papier ou lor ene roche, etc., ki révèle bane mystères caché.*

*Ene l'autre forme de révélation c'est ki kan nous entende ene la voix à l'extérieur comme si kikaine ti pé cause derrière ene rideau, mais la voix là li bien doux (délicieux) et gaie et li vini avec ene certain vitesse et lé cœur tire plaisir de sa. L'esprit li profondément plongé dans la pensée et nek ene coup nous entende sa la voix là et nous surpris kot sa li sorti et avec ki sanlà li (sa la voix là) pé adresser. Nous cherche ene kikaine kot la voix là capave vini et alors nous réaliser ki sa vine d'ene ange.*

De sa façon là bane prophètes vini et guide bane dimoune vers la fontaine de la connaissance spirituelle, afin ki zot passe zot soif spirituelle. Maintenant, la source ultime de tous bane la vies et donc, de la vie spirituelle c'est Allah ki Tout-Puissant et Qui au courant de tout. Bane prophètes vine établir bane liens entre bane dimoune et zot Bondié. La Révélation d'Allah li ene don spécial de la

connaissance. Sa connaissance li traduire par la proximité d'Allah et la connaissance de So nature et de So bane attributs. Li, c'est-à-dire, Allah, ki transmette sa connaissance là à toute ene génération de bane êtres humains, bizin Li-même possède la connaissance en abondance. La connaissance d'Allah c'est la connaissance de bane attributs divine ki vine aussi de l'observation et de l'expérience.

Ene de bane dons spéciale ki sak Messenger d'Allah recevoir d'Allah, c'est donc le don d'ene connaissance spéciale. Bane ki reste en compagnie de bane dimounes élu par Allah bénéficié de beaucoup de bane l'avantages. Dans ene certaine mesure, zot gagne la connaissance de la relation entre Allah (swt) et celui ki fine élu par Allah. Toutefois, la connaissance parfait l'élus recevoir, pas pou capave partager avec bane les autres et quant à la connaissance d'Allah (swt) – li en effet unique. Kan l'élus li accusé de mensonge et ki bane dimounes réfute (rejette) li au-delà de la raison, alors couma ene fermier ki aiguize so faucille kan arrive l'heure de récolte, coumsa même Allah (swt) prépare Li contre bane ki fer bane tel accusations de mensonge. Mo trouver ki le temps fine vini. Allah (swt) ena en effet ene plan complet et raisonné.

Nous trouve dans la loi de sa lé monde là ki kan ene léroi (ou ene chef) alle trouver ki ene dimoune pé opprimée, alors li aide li. Alors, kifer Allah (swt) – ki so connaissance ki pli grand et kot pas ena aucaine doute et Qui au courant de tous bane situations – pas pou aide sa dimoune opprimé et sincère là, ki pé opprimé selman parski après ki li fine recevoir ene révélation de la part d'Allah (swt), li fine annoncer ki li fine vine de la part d'Allah pour la réformes de bane dimounes ? Allah (swt) jamais pas rejette So bane serviteurs justes. Li aide zot, bien ki c'est la façon de faire d'Allah ki Li Patient, et (si arriver ene dimoune) dire ki Allah (swt) pas au courant de sa accusation de mensonge là ou de bane réfutation (ki bane dimounes lancer contre So élu), alors (pou dire sa parole là, ki Allah pas au courant de sa) sa ene *Kufr* (non-croyance). En vérité, Allah conscient dès le début de tout saki passer (et faire par tous So bane créations).

Mo termine mo Khutba ici même. Ki Allah permette nous tous pou compran le Concept de bane Révélation Divines. *Insha-Allah*.